

S. NICETIUS MARTYR.



Nicetius eruditione & sanctimonia uitæ apud Germanos insignis extitit. Itaque subinde cogitauit, quānam ratione Christi gloriam promouere, atque Euangelij doctrinam Barbaris inculcare posset. Vnde anno trecentesimo sexagesimo quinto apud Gothos & confines nationes Germanorum ad Istrum habitantium ueræ religionis mysteria apperuit, atque multos ad Christi cultum sua prædicatione pertraxit. Verūm eo tempore Hartanarus rex Gothorum in Christianos sæuijst, atque pios homines ē Germania in Romanum solum exturbauit. Hac ratione etiam S. Nicetius iuxta Danubium à Gothis captus fuit. Is cum ad idola duceretur, atque ea adorare nollet, uiuus igne exustus est. Auent. lib. 2.